

KERATAN AKHBAR

TARIKH : 27 JULAI 2023

AKHBAR : SINAR HARIAN

PAUTAN <https://www.sinarharian.com.my/ampArticle/270305>

Ekonomi Madani tetapkan tujuh penanda aras - PM



KUALA LUMPUR - Ekonomi Madani menetapkan tujuh penanda aras sebagai sasaran jangka sederhana yang mahu dicapai sebelum 10 tahun.

Perdana Menteri, Datuk Seri Anwar Ibrahim berkata, antaranya, Malaysia berada di kedudukan antara 30 ekonomi terbesar di dunia dan Indeks Daya Saing Global di tangga ke-12 teratas dunia.

"Ketiga, peratusan pendapatan buruh mencapai 45 peratus daripada jumlah keseluruhan pendapatan, sasaran Rancangan Malaysia Ke-12 (RMK12) adalah 40 peratus menjelang 2025.

"Keempat, kadar penyertaan wanita dalam tenaga buruh mencapai 60 peratus. Kelima, Indeks Pembangunan Manusia di tangga 25 teratas dunia.

"Keenam, Indeks Persepsi Rasuah di tangga 25 teratas dunia dan ketujuh, kemampuan fiskal dengan defisit fiskal mencapai tiga peratus atau lebih rendah," ujarnya.

Beliau berkata demikian dalam Majlis Peluncuran Memperkasa Ekonomi Madani di Pejabat Suruhanjaya Sekuriti Malaysia, Bukit Kiara pada Khamis.

Dalam pada itu, ujar Anwar, bagi mencapai hasrat berkenaan, kerajaan menerusi Ekonomi Madani memberi tumpuan membawa Malaysia sebagai peneraju ekonomi Asia.

"Umpamanya, sektor pembuatan telah merosot di bawah paras 25 peratus kepada Keluaran Dalam Negara Kasar (KDNK). Pelan Induk Perindustrian Baharu 2030 (NIMP) yang bakal diumumkan pada bulan hadapan akan memacu semula perindustrian dan memangkin ekonomi baharu.

"Dalam jangka masa pendek, Kajian Separuh Penggal Rancangan Malaysia Ke-12 yang bakal dibentangkan di Parlimen akan memberi ruang untuk kerajaan membuat penilaian semula dan menyusun keutamaan, termasuk mengadun sebuah pertumbuhan jangka sederhana dengan dasar fiskal yang lebih mampan," jelasnya.